

**Radiokkut tv-kkuullu aallakaatitsisarneq pillugu Inatsisartut
peqquussutissaattut siunnersuut**

pillugu

Inatsisartut Kultureqarnermut Ilinniartitaanermullu Ataatsimiititaliaata

ISUMALIUTISSIISUTAA

Siunnersuutip aappassaaneerneqarnerani saqqummiunneqartoq

Inatsisartut Kultureqarnermut Ilinniartitaanermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Doris Jakobsen, Siumut, siulittaasoq
Inatsisartunut ilaasortaq Georg Olsen, Inuit Ataqatigiit. Siulittaasup tullia
Inatsisartunut ilaasortaq Ruth Heilmann, Siumut
Inatsisartunut ilaasortaq Ellen Christoffersen, Atassut
Inatsisartunut ilaasortaq Astrid Fleischer Rex, Demokraatit

Inatsisartut Kultureqarnermut Ilinniartitaanermullu Ataatsimiititaliaata UKA 2004-
mi siullermeerinnerup kingorna radiokkut tv-kkullu aallakaatitsisarneq pillugu
Inatsisartut peqqussutissaattut siunnersuut misissorpaa, makkuninngalu
oqaaseqaateqarniarluni.

Tusarniaanermi akissuteqaat

Siunnersuutip uuma ataatsimiititaliami suliarinninnerani tusarniaanermi
akissuteqaatit tunniunneqarsimasut nuutinnerinik ataatsimiititaliaq pissarsisimavoq.

Siunnersuut nassiunneqarpoq tusarniaassutigineqarluni ulloq 1. juni-miit 15. juni
2004 ilanngullugu. Peqqussutissatut siunnersuutip annertunera eqqarsaatigalugu
tusarniaanermi piffissarititaasoq sivikippallaartoq ataatsimiititaliaq isumaqarpoq,
Naalakkersuisullu piumaffigineqarput siunissami tusarniaasarnissani tamanna
eqqarsaatigisassagaat.

Ataatsimiinnerit

KNR, Nuuk TV aamma Inuk Media ilaatigut peqqussutissatut siunnersuummut isumaat tusarumallugit UKA 2004-mi ataatsimiititaliamit pulaarneqarput.

Ataatsimiititaliap siunnersuummut oqaaseqaatigiumasai

Peqqussutissaq una sivisuumik suliarineqarnikuusoq Kultureqarnermut Ilinniartitaanermullu Ataatsimiititaliap ilisimaaraa, siunnersuummilu allannguutissat pitsaangorsaallu pitsaasutut isigalugit. Radio-qarnermi TV-qarnermilu ineriartorneq annertoq ukiuni makkunani ingerlanneqarpoq, Ineriartornermullu tamatumunnga nunatsinni aamma malinnaanissarput ataatsimiititaliamit pingaartutut isigineqarpoq. Peqqussutissatut siunnersuut una assersuutissaqqissuuvoq. Ataatsimiititaliali, siunnersuutip pissusissamisoortumik kinguneratut aammalu tv-kkut aallakaatitassiornermut tunngatillugu siunnersuummi piumasaqaataasut kingunerisaannik, Naalakkersuisunutt inassutigiumavaa KNR-imut aningaasaliissutaasartut eqqarsaatigeqqeqqullugit. Aammattaaq KNR TV-mi Radiomilu teknikkikkut atortorissaarutinik digitaliseriinissap piviusunngortinneqarnissaa siunertaralugu nutarterinissamik pisariaqartitsineq Naalakkersuisunit misissorneqartariaqartoq Kultureqarnermut Ilinniartitaanermullu Ataatsimiititaliaq isumaqarpoq.

Ataani allassimasut tulleriinnerit malillugit siunnersuut misissuataarneqassaaq:

- 1) Inuiaqatigiinnik sullissinermi isumaqatigiissut
- 2) Kalaallisut aalakaatitassiat pingaarnerutinneqarneri nunalu tamakkerlugu tv-kkut kanalit isiginnaarneqarsinnaasut marluk
- 3) Radio aamma TV-neqvn
- 4) Allakaatitassianik paarlaateqatigiittarnerit allakaatitassioqatigiinnerillu
- 5) Siulersuisut
- 6) Aallakaatitsisinnaanermut akuersissutit

1) Inuiaqatigiinnik sullissinermi isumaqatigiissut

Ukiuni sisamani naammassisaqarnissamik isumaqatigiissummik ukiunut sisamanoortumik KNR-i Naalakkersuisunik isumaqatigiissuteqassasoq siunnersuummi nutaatut anguniarneqarpoq. KNR-ip suliffeqarfittut inuiaqatigiinnut sullissinerata pitsaassusaata nukittorsarneqarnissaa naammassisaqarnissamik isumaqatigiissutip uuma siunertaraa, isumaqatigiissutillu ilaatigut imarissavai KNR-p suliffeqarfittut naammassisaqarnissamik piumasaqaatit arlallit KNR-ip suliassanik aaqqiiniarnermi pisariillisaajuarnissamut pitsaassutillu ineriartortittuarneqarnissaanut tapertaasinnaasut. Ilusilersuinerup kingunerissavaa KNR-ip inuiaqatigiinnik sullissinermi naatsorsuutinik ingerlatsisinnaalernera, taamaalillunilu KNR-p imminut pisussaaffiliunneqartut naammassisimanerai uuttorneqarsinnaanngussalluni. Isumaqatigiissut ukiut sisamakkaarlugit nutarterneqartussaammat ataavartumik

iluarsiivigineqartarnissaanut periarfissaqarpoq, inuiaqatigiinnik sullissinermi pisussaaffiit KNR-p piviusunngortitassaanut inuiaqatigiit kalaallit naatsorsuutigisaasa piviusorsioortumik piviusunngortinneqarnissaat taamaaliortuarnikkut ersersinneqarsinnaavoq.

Naammasisaqarnissamut isumaqatigiissummik taama ittumik maannakkut KNR-ip Naalakkersuisunik isumaqatigiissuteqarnissaa Kultureqarnermut Ilinniartitaanermullu Ataatsimiititaliap isumaqatigiittup pitsaasutut isigaa. KNR-i inuiaqatigiinnitsinnut kultureqarnitsinnullu pingaaruteqarluartutut inissisimavoq. KNR-i aqutugalugu kulturerput oqaatsigullu siammartarpagut ilisimasaqarfiginerallu pigiinnartarlugu, inuiaqatigiinnilu sullissinermik isumaqatigiissut aqutugalugu kalaallinut inuiaqatigiinnut KNR-ip suliassani naammaginartumik ingerlannerai KNR-ip Naalakkersuisullu eqqumaniarfigisinnaavaat.

2) Kalaallisut aallakaatitassiat pingaernerutinneqarneri nunalu tamakkerlugu tv-kkut kanalit isiginnaarneqarsinnaasut marluk

Kalaallisut oqaasertalinnik aallakaatitassiat pingaernerutinneqarnissaat pingaaruteqartorujussuusoq ataatsimiititaliaq isumaqatigiittoq isumaqarpoq. Tamanna siunnersuummi § 24-imi taperserreqarpoq, allassimammat, "KNR-ip oqaatsit pillugit erseqqissumik anguniagaqarnermigut kalaallit oqaasiisa pigiinnarneqarnissaat ineriartortinneqarnissaallu peqataaffigissavaa".

Taamaattoq siunnersuummi § 24-imi allaaserineqartutut ullumikkut KNR-ip pisussaaffini tamakkiisumik naammassisimannngikai ataatsimiititaliaq isumaqarpoq, siunissamilu tamatuma annertunerusumik aallunneqalernissaa ataatsimiititaliap qilanaaraa.

KNR-i Danmarks Radiomit toqqaannartumik pissarsiaminit aallakaatitassianik akuttunngitsumik atuisarpoq. KNR-i Danmarks Radio-mik pitsaalluinnartumik suleqatigiinnissamut isumaqatigiissuteqarpoq, kissaatigisanilu naapertorlugit aningaasartuutaanngitsumik aallakaatitassianik atuisinnaalluni.

DR-ip aallakaatitassiaanik toqqaannartumik aallakaatitsiffiusinnaasunik nuna tamakkerlugu kanal-imik Naalakkersuisut pilersitsissasut ataatsimiititaliami ikinnerussuteqartup Demokraatineersup inassutigaa. Tamanna kalaallit nunaanni aallakaatitassiarineqartut kalaallisullu oqaasertaqartut aallakaatitassiat annertunerusumik aallunneqarnerulernissaat pillugu KNR-i periarfissinneqassaaq.

3) Radio aamma TV-nejvn

Aqutsinermik, nakkutiginninnermik siunnersuinermillu ingerlataqartussamik radio aamma tv-nejvnimik pilersitsinissaq peqqussummi siunnersuutigineqarpoq. Aallakaatitsinnaanermut akuersissutinik tunniussisarneq arsaarinnittarnerlu nejvni ilaatigut suliassarai. Nejvni pingasunik ilaasortaqaassaaq, ingerlatsinermut

tungasunit, inuussutissarsiornermut tungasunit, tusagassiuutitut tungasunit kulturikkullu paasisimasalinnit tamaneersunit sinniisoqarfigineqassalluni, taamaaliornikkut akuersissuteqartoqassatillugu naalakkersuinikkut arlaannaannulluunniit attuumassuteqannginnissaat qulakkeerneqassaaq. Nęvn-ip pilersinneqarnerani aallakaatitsisinnaanermut akuersissutitut tunngatillugu suleriaatsip pisariillisarneqarnissaa eqaallisarneqarnissaaalu pingaarnertut siunertarineqarpoq.

Radio aamma tv-nęvnimik pilersitsinerup kingunerissavaa radio-umut aamma tv-mut naammagittaalliortarfiup atuuttup atorunnaarsinneqarnera. Nęvnip atuuttup atorunnaarsinneqarnerani sipaarutaasussat nul kruuniunissaat siunnersuummi oqaatigineqarpoq, akerlianilli nęvnimut nutaatut pilersinneqartumut aningaasartuutissat imaassasut naatsorsuutigineqarlutik:

Nęvnimi ilaasortat akissaritinneqartarneri: 10.000 kr.

Nęvnip ataatsimiinneritut atatillugu angalanernut najugaqarnermullu aningaasartuutit: 20.000 kr.

Nakkutilliilluni pulaarnernut atatillugu angalanernut najugaqarnermullu aningaasartuutit: 120.000 kr.

Allattoqarnermut tapersiissutit: 70.000 kr.

Arlaannaannulluunniit attuumassuteqanngitsumik tusarnaartartunik isiginnaartartunillu misissuinernut aningaasartuutit: 280.000 kr.

Nęvnip maannakkut atuuttup atorunnaarsinneqarnerani sipaaruteqarfiunnginnera Inatsisartut Kultureqarnermut Ilinniartitaanermullu Ataatsimiititaliaata tupigusuutigaa. Radio-mut tv-mullu naammagittaalliortarfiup maannakkut atuuttumut naleqqiullugu Radio-mut tv-mullu nęvni suliaassanik amerlanerusunik suliakkerneqartussaavoq, kisiannili nęvni atuuttoq ataatsimiittarnernut allattoqarnermullu tapersiissutinik nukinnik atuiiffiusimavoq, ataatsimiititaliaallu paasinninnera malillugu nęvnip atorunnaarsinneqarnerani sipaaruteqartoqartussaavoq.

Tamatuma saniatigut arlaannaannulluunniit attuumassuteqanngitsumik tusarnaartartunik isiginnaartartunillu misissuinernut nalinginnaanngitsumik amerlassuseqartunik aningaasanik immikkoortitsisoqarsimasoq ataatsimiititaliaq naliliivoq, misissuinernimmi taama ittunik suliaqarnissaminut pissusissamisortumik KNR-i aamma suliaqartussaavoq.

Radio-mut tv-mullu nęvnimik pilersitsinissamut aningaasaliissutit amerlassusaat Naalakkersuisut isumaliutigeqqitariaqaraat ataatsimiititaliap isumaqatigiittup innersuussutigaa.

4) Allakaatitassianik paarlaateqatigiittarnerit allakaatitassioqatigiinnerillu

Tunisassiat radio tv-milu aallakaatitassanik aallakaatitsinerit pillugit KNR-ip najukkanilu radio-qarfiit tv-qarfiillu kiisalu tunisassiortut avataaneersut

akunnerminni annertunerusumik suleqatigiilersinnaanerat peqqussutikkut pingaarnertut anguniakkat ilagaat.

Siusinnerusumut sanilliullugu KNR-ip najukkanilu aallakaatitassiorfiit akornanni annertunerusumik suleqatigiittoqalernissaanik suliniut ataatsimiititaliap pingaarluinnartutut isigaa. Tamatumami KNR-ip illoqarfiit pingaarnersaata aallakaatitsiviatut isigineqarunnaarluni ullumikkornit annertunerusumik nunatta tamarmi aallakaatitsisarfiatut isigineqalenera kingunerisammagu. Sinerissami najukkanilu aallakaatitassiorfiit suleqatigiinnerisigut nunami tamarmi nunaqarfinit isorliunerusunillu nutaarsiassat ilanngussallu pissarsiarineqarsinnaalissapput, taamaaliornikkullu oqaatsitta assigiinngissutaat nunami tamarmi tv-kkut tusarneqarnissaanut periarfissaqalissalluni.

KNR-ip sullinneqarnissanik assigiingitsunik pisariaqartitsinermigut tunisassiorlut atornerisigut tapersersortassagai ataatsimiititaliap pingaarluinnartutut isigaa. Matumani KNR-i unammillertitit ingerlananilu isigineqassanngilaq. Taamaattumik KNR-i nammineq ingerlatseqatigiiffinnik pilersitsinissaminut periarfissinneqassanngilaq.

§ 29 imm. 3-p peerneqarnissaa ataatsimiititaliap isumaqatigiittup Naalakkersuisunut inassutigissavaa.

Kommunimut sanilerisamut immikkut akuersissuteqarnikkut nassitsisinnaanermut periarfissamik maannakkut ammaasoqara aamma pitsaalluinnartuuvoq. Nunarput isorartoqaaq kommunillu akornanni nassitseqatigiittarnerup nunap ilaani illoqarfiit ataasiakkaat imminnut atassuteqanerulersisinnaavai.

Taamaattoq annertussuseq pinnagu pitsaassuserli salliutillugu inerniliisoqartarnissaa eqqumaffigineqartariaqartoq ataatsimiititaliaq isumaqarpoq. Taamaattumik najukkani radio-qarfinnut tv-qarfinnullu tapiisarnermi malittarisassat peqqussummi aalajangersaavigineqarsimanerisa paasisaqarfigineqarneri ataatsimiititaliamut nuannersuuvoq, matumani ilanngullugu najukkani radio-qarfinni tv-qarfinnilu sulisut ilinniarteqqinneqartarnerisa ilinniarnerminnillu nangitsisinnaanerisa siuarsarnissaannut tapiissuteqartarnissaq immikkuullarissamik taaneqarput.

Tassunga atatillugu sulisut ilinniarnerminnik nangitsinissamut periarfissinneqarnissaat ilutigisaanillu inuusuttut radio-qarnermi tv-qarnermilu qanoq suleriaaseqartoqartarneranik paasisaqarnissamut periarfissinneqarnissaat siunertaralugu tusagassiutinik atuinissamut sungiusarfimmik (medietrøningsværksted) pilersitsinissamik KNR-ip pilersaarutaanut tapersiinini ataatsimiititaliap oqaatigiumavaa. Eqqarsaatit tamakku aamma maanngaanniit taperserneqarnissaat ataatsimiititaliap isumaqatigiittup Naalakkersuisunut innersuussutigivaa.

Aammattaaq naggueqatitta aallakaatitassiornermi suleqatigineqarnerunissaat inerisaaqatigineqarnissaallu Naalakkersuisunit sulissutigineqartariaqartoq ataatsimiititaliaq isumaqarpoq. Naggueqativullu ataatsimooruteqarpugut, inuunerput inooriaaserpullu pillugit annertunerusumik paasisaqarnissatsinnut

periarfissinneqartariaqaraluarluta. Tamatumani tv-mik tusagassiuutinillu atuinerup annertunerusumik suleqatigiissutigineqarnissaat periarfissaalluarpoq.

5) Siulersuisut

Siulersuisut suli pikkorinnerulernissaat pillugu eqqarsaatit nutaat ataatsimiititaliami amerlanerussuteqartut tassaasut Siumumeersut, Inuit Ataqatigiinneersut Atassummeersullu taperserpaat. Siulersuisuusuni nutaani ilaasortat arfineq-marluussapput. Siulittaasoq ilaasortarlu alla ataaseq Naalakkersuisunit toqqarneqartassaaq. Siulersuisuni ilaasortat sinneri tallimat nuna tamakkerlugu soqutigisaqatigiinnit ilinniagaqarfinnillu assigiinngitsunit innersuussisoqareerneratigut Naalakkersuisunit toqqarneqartassapput.

Ilaasortaq ataaseq isiginnaartartut tusaarnaartartullu nuna tamakkerlugu peqatigiiffiannit toqqarneqartassaaq. Ullumikkut isiginnaartartut tusaarnaartartullu nuna tamakkerlugu peqatigiiffeqanngillat, taamaattumik peqqussutip atuutilerfiani suli taamaattoqassagalarpat innersuussinissamut piginnatitaaffik KANUKOKA-mut tunniunneqartariaqassaaq.

Nuna tamakkerlugu taamaattumik isiginnaartartut tusarnaartarlullu peqatigiiffiannik pilersitsinissaq ataatsimiititaliami amerlanerussuteqartut taperserpaat Naalakkersuisullu aamma taamaasiornissaat inassutigalugu.

Siunnersuummi nutaami siulersuisut inissitsiterneqarnerat ataatsimiititaliami ikinnerussuteqartup Demokraatineersup tapersersorsinnaanngilaa. Siulersuisut pikkorinnerusut naalackersuinikkullu toqqagaanngitsut pigineqalernissaannik kissaatiginninneq siulersuisuni ilaasortat arlaannaalluunniit Inatsisartunit toqaneqartannginnissaa siunertarinqartoq siunnersuummi allassimavoq. Naalakkersuisunit toqqaannartumik siulersuisunut ilaasortat marluk toqqarneqartartillugit taamatullu innersuussisoqartoqareerneratigut sinnerisa Naalakkersuisunit toqqarneqartarnerat naalackersuineranut attuumassuteqanngitsunik siulersuisoqarnertut taaneqarsinnaanngitsoq Demokraatineersooq isumaqarpoq

Siulersuisut sukkulluunniit Naalakkersuisunit toqqarneqartussaatiillugit partiit illuatungiliuttut sunniuteqarsinnaanerat mattunneqassaaq. Akerlianilli immikkut soqutigisaqatigiiffinninngarnit suliffeqarfinnillu partiit innuttaasunit annertuumik tapersersorneqarput, tamannalu pingaartinneqarluinnartariaqaraluarpoq, pingaartumik inuppalaartumik suliffeqarfik KNR-itut ittoq pineqartillugu. Taamaattumik siulersuisut inissitsiterneqarnerat Naalakkersuisut allanngortitertariaqaraat Demokraatineersooq isumaqarpoq, taamaalilluni siulersuisunut ilaasortassanik partiit toqqaasarnissaat suli periarfissaqaqqullugu. Siulersuisunik pikkorinnerusunik isumassarsiaq aallaavigalugu siulersuisuni ilaasortat sinneri toqqarneqarsinnaassapput, tamatumani pineqartumut matumunnga immikkut piginnaassuseqarneri pingaartinneqarlutik.

6) Aallakaatitsisinaanermut akuersissutit

Siunnersuummi kapitali 3-mi, § 15-imit - § 18 oqaasertaliunneqarsimasut uku:
"KNR-ip akuersissutillu piginnittuata" paatsuuinermik pilersitsisinnaanersut
allangortittariaqarsinnaaneri ataatsimiititaliap oqaluuseraa,
oqaasertaliunneqartummi suliat aalajangersimasut allalluunniit pineqartunit tamanit
ataatsimut suliarineqartussaanerattut paasineqarsinnaammata.

Oqaasertaliussat pineqartut KNR-imut aqutsinermilu aallakaatitsisinnannermut
akuersissummik piginnittumut tunngassuteqarneri paatsoorneqarsinnaaqunagit
oqaasertaliunneqartut allangortinneqartariaqannginnerannik ataatsimiititaliaq
naliliivoq.

KNR-ip ingerlatseqatigiiffinnik pilersitsisinnaaneranut periarfissaasasa
killiliivigineqarnissaa eqqarsaatigalugu ataatsimiititaliap innersuussutaanut
naapertuuttumik Naalakkersuisut allannguutissatut siunnersuummik
saqqummiussereerpata, **ataatsimiititaliami amerlanerussuteqartut** Siumumeersut,
Inuit Ataqatigiinneersut Atassummeersullu, siunnersuutip ilusimisut iluseqartup
Inatsisartunit akuersissutigineqarnissaa inassutigaat.

KNR-ip ingerlatseqatigiiffinnik pilersitsisinnaaneranut periarfissaasasa
killiliivigineqarnissaa eqqarsaatigalugu ataatsimiititaliap innersuussutaanut
naapertuuttumik Naalakkersuisut allannguutissatut siunnersuummik
saqqummiussereerpata kiisalu siulersuisuni ilaasortassanik toqqaasarnissamut
tunngatillugu aammalu DR-ip aallakaatitassiaanik toqqaannartumik nuna
tamakkerlugu kanalimik pilersitsisoqarnissaanik Naalakkersuisut
ikinnerussuteqartup inassutaanut naapertuuttumik saqqummiussereerpata
siunnersuutip iluserisamisut iluseqartup akuersissutigineqarnissaa
ataatsimiititaliami ikinnerussuteqartup Demokraatineersup inassutigaa.

Taama oqaaseqarluni Inatsisartut Kultureqarnermut Ilinniartitaanermullu
Ataatsimiititaliaata Radio-kkut TV-kkullu aallakaatitsisarneq pillugu Inatsisartut
peqqussutissaannut siunnersuut aappaasaaniigassanngortippaa.

Doris Jakobsen,
Siulittaasoq

Georg Olsen

Ellen Christoffersen

Ruth Heilmann

Astrid Fleischer Rex